



TAPAK 8

Donald Trump-i nisung aika nem tatok agütsüogo

TAPAK 3

Conrad Sangma-i Chenanggre Stadium yanglutsü lung azüngtsü

VOL. XVIII NO. 97 (ADOK 97) DIMAPUR

YANGTEPNÜ (THURSDAY) AENJETI (JANUARY) 21, 2021

₹ 5.00

NLA Speaker-i BAC senden amentsü jazüker

Dimapur, January 20 (TYO): Nagaland Legislative Assembly Speaker Business Advisory Committee (BAC) Chairman Sharingain Longkumer-i January 29, 2021 nü 13 buba Legislative Assembly indang session tenetbuba Provisional Programme atema senden amentsü jatopogo.

Senden anepdang 11:00 ake nung Committee Room, Assembly Secretariat nung amentsü, ta Commissioner & Secretary, NLA, Dr. P.J. Antony-i tanü metetdaksü.

Iba senden nung Business Advisory Committee (BAC) züngsem ajak arua adentsü mepishir, ta Dr. P.J. Antony-isa ashi.

COVID-19 Nagaland: Nisung 12,067 nungi 11,731 taneptsü nguogo

Kohima, January 20 (TYO): Bodbarü Nagaland nung COVID-19 puteter dang nungibo taneptsü angur timba liasü. Nisung 12,067 rongnungi tang nisung 106 anepaludar.

"Tanü Kohima nung nisung ka dak COVID-19 aliba putet. Külén, shiranger nisung 7 taneptsü angur. Parnokji Dimapur nungi 6 aser Peren nungi 1 lir" ta Health & Family Welfare Minister, S Pangnyu Phom-i ashi.

Nisung 12,067 rongnungi parnok 11,731 taneptsü nguogo, ta paisa shisem.

"Nagaland nung taneptsü angubaji 97.21% lir. Nisung 88 asüba nungi parnok 78 coronavirus ajanga aser nisung 10 tanga timtem ajanga asü. Külén, nisung 142 tashi tanga state temi ogo" ta Health & Family Welfare Director, Dr Denis Hangsing-i metetdaksü.

District balala nung COVID-19 puteter: Dimapur (6,458), Kohima (3,776), Mon (605), Peren (504), Tuensang (245), Mokokchung (191), Zunheboto (142), Phek (47), Kiphire (41), Wokha (39) aser Longleng (19).

"Nisung 12,067 rongnung Traced Contacts 4,973, armed forces personnel 4,666, tanga state tem nungi arur 1,856 aser Frontline Workers 572 lir" ta Dr Hangsing-i ashi.

District balala nung tang anepalutem: Kohima (54), Dimapur (40), Mokokchung (11) aser Mon (1).

Tang anepalutem rongnung nisung 13 dak shirangba yimya terara lir aser 5 oxygen agüja anepaludar. Nisung 88 dakbo shirangba yimya kecha mali, ta paisa ashi.

Taneptsü angurtem: Dimapur (6,285), Kohima (3,664), Mon (593), Peren (504), Tuensang (243), Mokokchung (171), Zunheboto (139), Phek (47), Kiphire (40), Wokha (35) aser Longleng (10).

"Nagaland nung COVID-19 alitsü akok ta temolung melembi bilemba sample 1,23,470 tendangogo. RT-PCR ajanga sample 72,902, TrueNat ajanga sample 37,017 aser Rapid Antigen Test ajanga sample 13,551 tendang" ta Dr Hangsing-i metetdaksü.

DIPR Director-i DPRO den COVID atema jembi

Dimapur, January 20 (TYO): Nagaland nung Covid-19 vaccine agütsüba maparen atema IPR Director, Tokishe Sema-i January 20, 2021 nü DPRO ajak den zoom session ka ayonga agiogo.

District ajak nung Covid-19 vaccine agütsüba maparen tenzükogo, anungji DPRO temi

pei pei district nung lateta aliba ama otongdartem inyaksüla. Nisung ajaki mapang shitak nung vaccine angutsü aser osang shitak metetdaksütsüla, ta Tokishe Sema-i metetdaksü.

Paisa District shia nung vaccine agütsüba maparen tiptema inyaka aotsü atema DPRO temi yariteptsü ayongzük.

ULFA-I & NSCN-i totzü company nung mapa inyaker 2 pua lir

Digboi, January 20 (Agencies): Arunachal Pradesh kübok Changlang district nung December 20, 2020 nü totzü company nung mapa inyaker nisung ana pur aoba indang video ka ULFA-Independent-i sayaogo.

Nisung ana ya Quippo Oil and Gas Infrastructure Limited nung mapa inyaker tem lir aser Kumchaikha hydrocarbon drilling site nungi pur ao.

ULFA-Independent-i Myanmar nungi tena indang video ji yok.

Nisung anaji radio operator Ram Kumar (35) aser drilling superintendent Pranab Kumar Gogoi (51) na lir aser tena ULFA-Independent aser NSCN ket nung ita ka shi jungnüa yua lir.

ULFA-Independent-i video ana sayaba nung Ram Kumar Pranab Kumar Gogoi nati pei pei state sorkartem dang tena chiokdaksütsü atema mapa inyaksü mepishia lir.

Ram Kumar ya Bihar nungi lir aser pai Chief Minister Nitish Kumar dang iba otük ya Assam Chief Minister Sarbananda Sonowal den jembitsü mepishir.

Külen, Pranab Kumar Gogoi-ia "Chief Minister Sarbananda Sonowal ya Assamese nunger ka asü nung ni kidangi meypia arutsü atema mapa inyaksüla" ta ashir.

ULFA-Independent-i Quippo Oil and Gas Infrastructure Limited dang tena chioktsü atema Rs 20 crore meshir.

Noklak District dang 'Frontier District' jaloktsür



January 20, 2021 nü public ground, Noklak nung Chief Minister Neiphiu Rio, cabinet züngsemtem aser ketdangsürtem Noklak District sayaba sentong nung agiba noksa angur. (Noklak, January 20)

Dimapur, January 20 (TYO): January 20, 2021 nü Chief Minister, Neiphiu Rio-i Noklak District dang 'Frontier District' ta jalokja Nagaland nung district 12 buba kümetetba osang metetdaksüogo.

India Tatong Tir Venkaiah Naidu-i tanü Noklak District profile indang video ka sayatsü aser district tasenba moatsü.

Bodbarü public ground Noklak Hq nung Dy. Chief Minister, Y. Patton, Advisor L. Khumo aser Advisor H. Haiying nung lia Rio-i district tasen sayatsü.

Tanü Noklak District cum Khaozaosie- Hok-Ah festival lapoktsüdag CM Rio-i Noklak nung alirtem moatsü.

"Noklak district-i tatishitsü tajung sayatsü aser sorkar den amalitepa kechisarena ajaklen terenlok bener arutsü. Noklak district nung alirtem dang pei sasa züngsena alitsü aser lanurtemia tanü-asüng aluyimba maparen inyaksü ayongzük" ta paisa metetdaksü.

Noklak district ya Myanmar den arutsü anasa lir aser iba ajanga tanga East aser South east linüktem den sendakteper. Iba jagi 'Frontier District' tenüng jaloktsür, ta CM Rio-isa ashi.

COVID-19 vaccine atema olen ka jembidang Rio-i "iba vaccine ya mezüing health care workers, frontline workers aser arishi küm 50 temapur nem mezüing agütsütsü" ta ashi.

Chief Minister-isa Khiamniungan nung den Khaozaosie-Hok-Ah benjung salem lemsatep.

Sentong nung Deputy Chief Minister, Y. Patton-ia o jembidang Noklak District nung alirtemi kidanger district tem den jungteptsü aser longjema alitsü ayongzük.

Noklak district ya Nagaland nung tesem talangka pilar oa liaka, nübortem dang longjemra Nagaland nung advanced district akümtsü, ta paisa shisem.

Fisheries & Aquatic Resources, Eco & Statistics and Evaluation Advisor, L. Khumo-i CM, Neiphiu Rio, Dy. CM Y. Patton aser PDA sorkar dang Noklak District sayatsüba atema pelaba metetdaksü.

Prisons, Printing & Stationery Advisor, H. Haiying-ia ashiba agi "January 20 ya Noklak nung alirtem atema otsütsütsü anogo ka asütsü."

"Noklak nung alirtemi mapang talangka nungi district aginüa aru aser tanü ibaji asangsang nung

atalokogo. Noklak district ya East atema kishi lir aser sorkar teyari ajanga East linüktem asoshi kishi chichiba akümtsü imlar" ta H. Haiying-isa metetdaksü.

Iba sentong nung Chief Secretary, J. Alam, IAS, Deputy Commissioner Tuensang, Kumar Ramnikant, IAS aser Khiamniungan Tribal Council Tir M. Thangou nungertemia o jembi.

Tanü Khiamniungan Baptist Churches Association Executive Secretary, P. Hempao Lam-i Nüngshilung meshiteta sarasadem.

Sentong nung Noklak Deputy Commissioner, Remy Wilfred, IAS-i tesentepertem pelaa agizük aser Superintendent of Police Noklak, Dr. Pritpal Kaur Batra, IPS-i anküp tepela o jembi.

Külen, Khaotsoasie Hok-Ah sentong nung Khiamniungan Tribal Council Advisor, P. Pongom-i benjung teratet metetdaksü.

Iba sentong nung Ex. Minister P. Longon, Ex. Parliamentary Secretary S. Heno, ENDBU, tir R. Muthsodang Sangtam, Khiamniungan Tribal Council taoba tir L.Ngon aser KTC Tir & Convenor Steering Committee M. Thangou nungertemia o jembi.

Aortemi oshi aser sobaliba wazüka ayutsüla: Metsubo Jamir

Dimapur, January 20 (TYO): January 19, 2021 nü Molu Ki, Kohima nung Kohima Ao Officer tem Telongjem (Kohima Ao Officer's Union) lokti senden menogo.

Iba senden nung Rural Development Minister, Metsubo Jamir-i tongti tesemdang ama shilem agi.

"Ketdangsürtem pei pei office aser department nung kanga dang mazüing liaka, KAOT asoshi mapang agüja yaritepba atema tenüngang agütsür aser maneni iba lokti atema tajungtiba agüja inyaksü ayongzük" ta Metsubo-i ashi.

"Tsüngremi wadang balala nung Aor moatsüogo saka asenok melongjemba ajanga tejakleni mouteter. Asenoki bendanger sobaliba sapua benshiba ajanga Aor sobaliba aika samaa odar. Tsürabur aser chirnurtem tanga oshitem ajanga jembiha ajanga Ao oshi samaa odar" ta paisa metetdaksü.

"Ketdangsürtemi Mokokchung nung mapainyaksü lemzükramaongka ka ama agitsüla, kechiyong asen sensoi dang Mokokchung district nung terenlok aser temelenshi bentsür arutetsü. Mokokchung district azüingazünga kümogo kechiyong senso aikati district toktsür tangalen oa alir" ta paisa olen ka lemsatep.

"Mokokchung the Land of Pioneers" ta asüba tetezü mali kümdar kechiyong school aser college kar dang aliba nunga kaketsür peria mali. Tsürabur aikati pei chirnurtem tangalen azüngtsü atema yoker. Anungji, Mokokchung district nung senso ajema akümba ajanga census nung kongshio aser iba ajanga district nung constituency ajema akümtsü akok, ta Minister Metsubo-isa metetdaksü.

"Aor ketdangsürtem longjemtsüla aser pei sobaliba, oshi aser census nung temolung agütsütsüla. KAOT ya Aor lokti nung temelenshi bener arutetsüba lokti ka lir anungji tanga district tem nungi Aor ketdangsürtem arua shilem agitettsüsa mungdang ayongzüka amongtsüla. Iba mapang kati ka den tebilemba aser shisatsü lemsateptetsü" ta paisa ashi.

Iba sentong nung PWD (Housing & Mechanical) Minister Tongpang Ozukum-i Kohima Ao Officer tem Telongjem (KAOT) dang nungi Aortemi tebilemba aser shisatsü angutsü ta ashi.

"Mokokchung dang Land of Pioneers ta ajaba tetezü mali kümdar. Anungji KAOT-i Aor dang shisatsü lemsateptsüla. Küm nung khen mesüra küm ana nung khen amai district ajak nungi Ao ketdangsürtem

ayongdena mungdang amongtsüla aser iba mapang Aor loktiliba nung temelenshi bener arutsü atema shisatsü lemsateptsüla" ta Tongpang-isa metetdaksü.

Iba sentong nung KAOT Tir, Meyionen Jamir-i tesentepertem pelaa agizük aser KAOT tentetba osang tatsü agi lemsatep.

KAOT ya 2003 küm Aor ketdangsür 600 tema züngsema tentetba liasü tawa nübo ajema kümogo. Sorkar office aser department tem nung Aor ketdangsür tasen aniokba dang nungibo mapa nungi sodi angur timba lir, ta pai metetdaksü.

"Aor ketdangsürtemi nübortem bendanga agüja tenzütsü aser pei mena aliba mendenji nija atema meinyaksüla. Asenok ajak longjemer KAOT ajungketdi" ta Tir, Meyionen-isa ayongzük.

Iba sentong nung KAOT Tatong Tir Dr. N. Meren Imchen-i anküp tepela o jembi.

Kohima Ao Officer tem Telongjen 2021-2022 ketdangpurtem:

Tir- Moatemsu Aier, Tatong Tir- P. Nungsangwapang, Tezüür- Imtimenla, NCS, Repsem Tezüür- O. Imliwati Jamir, Senotsü Tezüür- Talitemsu aser Senyur- Sentianger Imchen, IAS.

Ghukhuyi yimtsüng nung 3 buba Chengu benjong mungogo



Tourism and Art and Culture, Advisor, H. Khehovi Yephuthomi-i Chengu benjong nung o jembiba noksa nung angur.

Dimapur, Aenjeti/January 20 (TYO): Japan fund for global environment of the environmental restoration and conservation agency-i yarisema Tizu valley biodiversity conservation and livelihood network (TVBVLN) ajanga January 18, 2021 nü Ghukhuyi yimtsüng nung 3 buba Chengu benjongmung ayongzüka munga liasü, kong Advisor, Tourism and Art and Culture, H. Khehovi Yephuthomi ya alakteta jaoker aser Agriculture Production Commissioner, Y. Kikheto Sema, IAS ya tetushi tesemdang ama dena liasü. 'With special focus on traditional agriculture' omen kübok iba benjong ya munga liasü.

Iba sentong nung jembiba mapang, Tsüngremi nisung meimchir nem agütsüba sempet tulutibaji libajen aser yangji aliba rongsen ya lir aser state tilaka dang süaka asen lima nung tepour tajung alijak, sobaliba aser yimsü-yimpong nung takar lir, ta Khehovi-i ashi.

Pai nübur ajunga dang pei ali rongsen wazüka ayutsü ajungshi aser shikaria ali

rongsen samatsüba yimyatem indoktsü ayongzü. Yimtak yimtsüngtem nung aliba makamaiter yaritsü atema central sorkar aser state sorkari scheme aser project balala agütsüba junga amshitsü atema pai ajungshia liasü.

Paisa nüburtem, talisa tain rogodem dang lanur dang akhi tetsü-tebou ken, otsü, tsüsang aser sobaliba sayutsü aser süposolemtsü wazüka ayutsü sayutsü mepishi, anungjidang parnoki parnok chirtem dang sayutsü aser yamaji sobaliba tajung wazüka mesamai amshitsü, ta ashi. Iba anogomung nungsa pai Chengu ozü ya chioka liasü, koba shikarir nung kumzüka liasü.

Y. Kikheto Sema IAS-ia iba sentong nung jembiba mapang ali rongsen wazüka ayutsü, arem shiruru kumzüksü aser shikariba, süng atsüngba, ali telung nung rongsen bushiba nokdanga tzu-mopung aser yangji aliba takum shiruru temaba jenjang nung ajungkettsü atema jembiba.

Asen ali rongsen wazüka ayuba ajanga asenoki

alirongsen samaa aoba ajemdaktsütsü aser tarutsü putu jangratema alitsü atema amshiba rongsentem wazüka yutsütsü, ta pai ashi.

Pai yimtakir dang alu ayimba yimya amshitsü ajungshi aser ali meraksadaktsüi taluposa alu ayimtsü atema pesticides mesüra nisung yangluba yimyatem amshitsü atema tali metetjemtsü asoshi Agriculture department mesüra Forest department dangi arua asüngdangyatsü ajungshia liasü.

Modernization aser Naga nung loktiliba melenshiba ajanga akhi mapang nung amshiba aluyim mesüra jhum cultivation ya tang melenshia aoba mapang ka lir, anungji tajungtiba nung renloktsü asoshi shifting cultivation angatettsü ya tongtipang kumogo, ta Y. Kikheto Sema-i ashi.

Deputy Commissioner Zunheboto Peter Lichamo, NCS-ia iba sentong nung o tatsüka jembiba mapang Chengu benjong mungtetdaktsüba atema yimtsüng asem, Kivikhu, Sukhai aser Ghukhuyi nung aliba GB, tebu-teti aser nübur ajunga dang pelaba lemsatop aser danga yimtsüngtemia parnok dak nungi angazüka arem shiruru aser ali rongsen wazüka ayutsü atema tarutsü nung iba dang nungi tajungba nung ayongzüksü ajungshi.

Iba sentong ya Tavin Chishi aser Eli Yetho nati anir agia liasü, kong Sataya Prakash Tripathi IFS, chairman NSBB ajanga benjongmung ratettsü aser Kakishe Murru-i tepela ankep o jembiba liasü.

Iba sentong nung yimtsüng asem nungi telok balalai sobaliba saya balala sayua liasü.

Deputy Commissioner, Mokokchung ajanga metetdaktsür

Dimapur, Aenjeti/January 20 (TYO): Imkongmeren Sports complex, Mokokchung nung January 26 nü Republic Day sentong ya akhi ama anepdang 8:40 ako nungi tenzüksü, ta Ungma yim, Mokokchung yim, Chuchuyimpang yim aser Khensa yim indang putu menden aser GB, Mokokchung Town indang GB tem, ward 18 kübok ward tentet nung ketdangsürtem aser Mokokchung jila nung aliba nübur ajunga nem metetdaktsür, ta Deputy Commissioner, Mokokchung, Limawabang Jamir ajanga sangdong ka nung ashi.

Tang COVID-19 tashidak wara agi bena arutsüba tensa mechi aser lokti tulu madenshitsü asoshi lokti tentet

ajunga nungi iba 72 buba Republic Day anogomung nung adentsü asoshi nisung timba agi pongu (5) jaoker, ta sangdong ajangasa ashi.

Maneni sangdong danga ka nung Deputy Commissioner, Mokokchung, Limawabang Jamir-isa Mokokchung District kübok Head of Departments ajunga dang 72 buba Republic Day Celebration 2021 ya Imkongmeren Sports Complex, Mokokchung nung anepdang 8:40 ako nung tenzüksüm ta metetdaktsü.

Anungji HOD ajunga iba anogomung nung arua adentsü metetdaktsür. Kasa mapang iba sentong nung adener ajaki face mask agitsü aser COVID-19 dak sendakba totuyubatem sülen anidaktsü, ta Mokokchung DC ajangasa metetdaktsü.

DoSE ajanga tesayurtem training agitsü atema metetdaktsür

Dimapur, Aenjeti/January 20 (TYO): Directorate of School Education ajanga sangdong ka nung, anünga aliba district trok, Mokokchung, Tuensang, Longleng, Mon, Phek aser Kiphire atema Science aser Mathematics Graduate

Teachers nem department ajanga training agütsütsü, ta metetdaktsüogo. Government School tem nung Science aser Mathematics GT atema Online Training agitsü anogo aser mapang:

Phase II			
Sl.No	District	Date	Time
1	Mokokchung	28th Jan - 30th Jan 2021	9:30 AM - 3:30 PM
2	Tuensang	1st Feb - 3rd Feb 2021	9:30 AM - 3:30 PM
3	Longleng	4th Feb - 6th Feb 2021	9:30 AM - 3:30 PM
4	Mon	8th Feb - 10th Feb 2021	9:30 AM - 3:30 PM
5	Phek	11th Feb -13th Feb 2021	9:30 AM - 3:30 PM
6	Kiphire	15th Feb - 17th Feb 2021	9:30 AM - 3:30 PM

Anungji tesayurtem dang iba osang sangdonger anogo pongu (5) tsungta agüja aliba link (<https://reg.ramietech.in>) nung online ajanga register asütsü metetdaktsüogo.

Iba totuyuba sülen

manidakba tesayur nem temerenshi agütsütsü. Online Registration dak sendakba nung jangjashitsü kar lira mobile number +91-8730029961 ajanga tongteprateptsü akok, ta sangdong nungsa shia lir.

Aboi nung COVID-19 vaccination drive tenzükogo

Dimapur, Aenjeti/January 20 (TYO): Aboi Sub-Division kübok Healthcare worker atema COVID-19 vaccination sentong January 20, 2021 nü Community Health Centre Aboi nung tenzükogo. Aboi Sub-division nungi iba mozü ya CHC Aboi indang Mo, Dr. Hukiye Chopy mezüng agia liasü.

Sentong tatsüka agiba

mapang Dr. Hangsha Konyak-i nüburtem dang marendaki iba mozü agitsü ayongzü aser COVID-19 mozü ya pa mezüng agi, ta ashi.

Iba sentong nung Tsüngrem temoatsü jazüka Pastor Mongnyei-i sarasademba mapang nüburtem dang tsübua malitsü aser iba mozü indang olulu prokshiba nungi pila alitsü ayongzüka liasü.

Tuensang nung Multi Skilled Handyman Training tembangogo

Dimapur, Aenjeti/January 20 (TYO): Department of Employment, Skill Development & Entrepreneurship, Tuensang ajanga sponsor asüba Multi Skilled Handyman Training sentong Town Hall, Tuensang nung January 20, 2021 nü tembangogo, koba Zynorique Initiatives Society (ZIC) den lungjemer ayongzüka liasü.

Iba training ya Town Hall aser GHSS Thangjam, Tuensang nung anogo ter agi, kong Plumbers, Tiling aser Electrician training agüja liasü. Iba sentong nung Rohit Sharma IAS SDO (C) Tuensang ya alakteta jaoker

liasü aser kasa sentong nung ENSF idang general secretary, Imti Chuba dena liasü.

Rohit SDO (C) ajanga training nung adener nem kuli kaketter agütsü aser maneni training agirtem dang parnoki angazükbatem tajungtiba nung amshitsü ajungshia liasü.

Region nung skill development atema Eastern Naga nung nem temolung tali agütsüba atema ENSF general secretary Imti Chuba-ia Employment, Skill Development & Entrepreneurship Director, Chiden Yaden aser par team dang pelaba lemsatop.

FAC nung Land Donor Association den senden amen



Dimapur, Aenjeti/January 20 (TYO): Fazl Ali College (FAC), Mokokchung indang IQAC (Internal Quality Assurance Cell) teyaritep nung FAC Land Donor Association, Chuchuyimpang den shisatokten senden ka January 19, 2021 nü IQAC Office nung mena liasü.

College-i NACC Peer Team arutsü aliba temolung nung yur tang college nung terenlok maparen inyakba nung ajaklen nungi lirumedema yariteptsü atema kisüng iba senden ya

mena liasü.

FAC Land Donor Association, Chuchuyimpang nungi tir, secretary aser züngsem iba senden nung adenba atema pelaba lemsatopba mapang tang college amenoka aliba tesem tenlaba atema College indang Principal-i pelaba nenshia ashi.

College tangatetba, faculty-staff temi maparen balala inyakba, ki-o-jen yanglutsü aliba aser nükla balala tem IQAC züngsem P. Tiatemsu-i senden nung lemsatopba liasü.

Kasa mapang Association tenüng nung arua adener züngsem asemprongi telangzüba tajung agütsü aser academic tsütsü iba college temaba jenjangi ajungkettsü atema maneni yariteptsü shia liasü.

Maneni IQAC Convenor, Dr. Lanurenla-i tongtipang onük kar süoka jembir iba senden tembang, ta Fazl Ali College, Mokokchung indang Information and Publicity Cell ajanga sandong ka nung lemsatop.



Bodbarnü Champhai nung District Election Officer Pi Maria C.T. Zuali-i Champhai district atema tatemba photo electoral rolls sayaogo. (Aizawl, January 20)

Re-SVAYEM scheme ajanga lanur lakh 2 ajangzüksü

Guwahati, January 20 (Agencies): Re-Swami Vivekananda Assam Youth Empowerment (Re-SVAYEM) scheme ajanga lanurtem pei sasa liyonga aotsü atema teyari angutsü ta Assam finance minister Himanta Biswa Sarma-i ashi.

North Guwahati nung Kumar Bhaskar Barman Kshetra nung Re-SVAYEM scheme tenzüksüadang Sarma-i iba ya metetdaksü.

Re-SVAYEM scheme ajanga Assam nung lanur nem Rs 50,000 agütsütsü.

Iba scheme kübok sorkari tetsür aser tebur lakh 2 nem senotsü teyari agütsütsü. "Re-SVAYEM scheme kübok state sorkari tetsür mesüra tebur 5 nungi 10 adenba self-help groups (SHG) tentettsü. Iba ajanga parnoki mapa balala inyaka otettsü" ta Sarma-i ashi.

"State sorkari züngsem 5 agi akümba SHG nem Rs 2.5 lakhs aser züngsem 10 agi akümba SHG nem Rs 5 lakhs agütsütsü aser iba ajanga parnoki shishilembatettsü" ta paisha shisem.

Mezüng atema state sorkari lanur lakh 2 nem Rs 30,000 agütsütsü. Parnoki anogo asemnü training ka agitsü aser iba sülen parnok indang bank account nung Rs 20,000 enoktsütsü.

State sorkarisa item SHGs nem yimtsüng balala nung government services tilala inyadaksütsü.

"Onoki SHGs nem akokba tashi teyari agütsütsü. Parnoki banks aser financial institutions nungi loan agitsü atema onoki yaritsü" ta Minister Sarma-isa metetdaksü.

NRC nungi tenüng züngdokertemi vote enoktettsü: CEC

Guwahati, January 20 (Agencies): Assam nung National Register of Citizens (NRC) nungi agienba nisungtemi Assam Assembly elections 2021 nung vote enoktsütsü ta Election Commission of India (ECI)-i metetdaksügo.

Bodbarnü Guwahati nung Chief Election Commissioner (CEC) Sunil Arora-i iba osang ya metetdaksü.

CEC Arora-i Election Commissioner ana den külemi Assam nung anogo asemnü mongzüka election dak sendakba maparen ashi.

reprangshimer.

Parnoki district election officers, SPs, commissioner of police, divisional commissioners aser IGs den ajurutepa sendentem menogo. Parnokisa Assam state chief secretary, DGP, home secretary aser tanga tongti ketdangsertem dena ajurutepogo.

EC-i tang tashi election agitsü anogo ano memetetdaksü lir.

"Bihu benjung indang anogotem repranga election anogotem shimtsü" ta CEC-i ashi.

Conrad Sangma-i Chenanggre Stadium yanglutsü lung azüngtsü

Shillong, January 20 jembi.

(Agencies): Bodbarnü Meghalaya Chief Minister Conrad Sangma-i North Garo Hills district nung Chenanggre Stadium yanglutsü atema lung azüngtsügo.

Iba stadium ya Williamnagar kübok Adokgre nung yanglutsü.

"Chenanggre Stadium yanglutsü lung azüngtsüba ajanga ni aen lanurtem asoshi tarutsü moatsür" ta CM Conrad Sangma-i ashi.

Chenanggre Stadium lung azüngtsüadang Conrad-i tebu aser taoba Lok Sabha Speaker asür PA Sangma bilemteta

"Adokgre ya küboi kanga meimba tesem ka liasü. Asür PA Sangma-i teti iba tesem nung election nüboyimba sentongtem tenzüik. Pai iba tesem dang 'Chenanggre' Takok anguba lima ta jatettsü" ta CM Conrad-i ashi.

Meghalaya Chief Minister-isa Bodbarnü Adokgiri Secondary School indang school ki tasen lapoktsü.

Iba school ki tasen ya Adokgre aser North Garo Hills nung tanurtem tarutsü atema bendanga agütsür, ta Conrad-i ashi.

Mizoram nung mozü & yi raksaa endok

Aizawl, January 19 (Agencies): Mizoram nung Marathi Thutlia Py (MTP), Siaha Vaihi Branch office nung sentong ka agidang heroin aser psychotropic pills dena mozü aika raksaa endokogo.

Mizoram Excise and Narcotics Department Minister, Dr K. Beichhua-i tetuyuba agütsüba sülen iba mapa ya inyak.

Mozütemji MTP (Mara youth Organisation), Siaha

Vaihi Branch ajanga apuba liasü. Iba nung IMFL pongdang 234 aser local hooch litre 10 dena liasü.

"NGO lennir ka ama ni drugs anema rarayonga aru aser yimsüsür ka ama maneni raratsü" ta Beichhua-i ashi.

Paisa lanurtem dang tetsükdaksü ajuru nunga tajung atema masetshii noktaksü ayongzüik.

Hombarnü parnoki Rs. 5.5 lakh alangba drugs aser yi raksaa endokogo.



Mongulbarnü Assam health minister Himanta Biswa Sarma-i North Lakhimpur nung Lakhimpur Medical College and Hospital semdangdang agiba noksa angur. Assam nung Medical College and Hospital tasenba ya Rs 378.2 crores endoka yangluogo. (North Lakhimpur, January 19)



**DISTRICT ADMINISTRATION &
DISTRICT LEVEL CENTRE FOR WOMEN-
MAHILA SHAKTI KENDRA, MOKOKCHUNG.**



**CELEBRATES
BETI BACHAO BETI PADHAO WEEK
21st-26th January 2021**



**Tanur tetsür asodang pelati aser
jala aliba agi nüma dangti.
Tetsür aser tebur tsüngda liromedem
renlokdaaksütsü lenmang bushidi.**



TIR YIMYIM YIMOBILEM (EDITORIAL)

DIMAPUR YANGTEPNÜ, AENJETI (JANUARY) 21, 2021

TETSÜR CHANU MEIMDI

Tanü January 21 nungi tenzüka 26 tashi ya linük ajaklen tetsür chanutem meima anepalutsü aser tajung kümdaktsütsü asoshi tangatetba agüja ajungshitepba hopta amonger. Iba hopta dang ya "Beti Bachao, Beti Padhao Week" ta ajar. Tetezü, 'Tetsür chanu taküm kümzükan aser Tetsür Chanu züngdakjang,' ta nübortem ayongzüka yimyim ka lir. Atangji, India nung balaka tesem aika nung tetsürtem yabo nisung masü saka dokan nung sen agi alitsü akokba osetang ka ama amshir. Ano, aikati tetsür chanu asoba yabo kidang ki mapa inyaktsü aser taküm tepiyong kilir ama tebur tenzüka alitsü aso amai bilemer. Aji oda, asenok Naga nunger loktiliba nunga kin karbo tetsür kiyii yokbaji sen dalang yong yokadoker. Aji oda, kibong nung tetsür chanu asoba yabo meinprongtsü aser tamagitsü tanur ka asor ama bilemba kin aser tsüraburtem aika lir. Aiben asenok aikati tetsür asodang kinungtsü dang dena mepelar, saka tetsür tebur asotsüba metsüjibo tebur dak keta lir aser ano talisa, asen sobaliba nung tetsür senmang mali, anungji ajaki tebur chanu dang sonür. Iba tangatetba jagi tsürabur aikati kasa pei chirnurtemsa süaka jala dang nungibo jabasoang temeimba meimba angur. Ano, tazünga nunga tetsürbo tangar tebur kiyii aotsüji talangka mezüngdaktsüner, kechiyong senotsü endoka tetsür züngdaktsübjibo teindok amai bilemer. Aji oda, kidang mapabo ajak tetsürtemi inyaktsüla saka tagitsübo ajak teburtem meyong asütsüla ta asüba sobaliba aser tangatetba nung asenok aika inteta lir. Ano, tamajungtibaji, talisa, India nung aikati tebok nung tanur bena alidangyongi tetsür chanu süra raksaa endoker, iba jagi tangbo tanur tebok nung bena alidang tetsür asü tebur ta atsüapong metettsü reprangtsübjaji ozüngi memelar. Atangji tanübo asenok Naga nungertem rongnungbo kibong aika nung jala jabaso na tsünga kecha tebandang maka meima anepalur aser kaketshisatsüa kasasa agüja, tetsür chanu, tebur chanu ta mali ajak tajung kümdaktsütsü meranger. Ali senmang nunga, joko, akhi tetsü tebou mapang yim akümdang nungi amanga aruba ali kimong dak alaka, tanübo tetsürtemiang senotsüa teimba ajangzüktetter aser government mapa nunga aser business nunga tetsürtemiang jenjang tuluba aser tajangzükan tuluba ngua inyaktetter, anungji tetsür ali senmang tuluba kuma aoba angur. Joko, tanübo putu mendena tetsür DC mesüra Chief Secretary kübok iadokogo. Iba amaji, memenui, asen lima nunga tetsürtemang yimsüsür, MLA aser MP akümtsü. Iba ama putu ka nung, yashi asenoki tetsürtem dang "nenok tetsür tanur süngolanga memeyong" ta jembiba to mapet aser taaktsüka kumogo. Joko, tetsüriang yimsü asür, kibonga tetsürtemiang mesür aser tsürabur tantsür tambur kümer külena tetsürtemisa temeimba meima anepalur. Tanübo iba ama tetsür taküm ka mezüngmeshitsübjaji matumalem shisa maka mapa ka asütsü. Alima nung asenoki aginüba shima-shima agitsüsa temoatsü aika lir saka asen tsürabur aser asen chirnurtembo asenoki mulungba nung shimba magitettsü. Item temoatsü aser senmang yabo Tsüngremi dang agütsür, anungji asen tsüraburtemji makamait aser mashimemetet asütsüa akok saka parnok ajanga asenok alimai arutsüsa Tsüngremi moatsü. Kasaji asen chirnurtema tetsür dang asotsüa akok mesüra tebur dang asotsüa akok, itemji aseni asen mulungba nung masü saka Tsüngremi Pa nükjidong ataloktsü asoshi asen nem moatsü, anungji tetsür - tebur kecha mali, ajak kasasa asen nem moatsüba Tsüngremi senmangertem lir. Asenok alima nung mapang tatsüka alidang asenoki ali senmangteptsü indang bilemer saka ali ya asenok meyong masü, ya Tsüngremi meyong, asenokbo khien lir toktsütsü. Ibaji atema asenoki tetsür mezüngmeshira, Tsüngremi aser nisung tsüngdang asenok kanga mangatetba purtem asütsü. Asenok asoshibo jala jabaso ajak kasa dang aser mapaa kasa dang, ya tetsür mapa aser ya tebur mapa ta kecha tebandang mali. Teburi surochioktsü, ki aoktsü, sü ashitsü aser naro anepalutsü aser tetsür gari anir mapai aotsü. Tebur ali nung asentzü sena mapa inyaka senzüdang, tetsür ita petinui tur alur. Joko, atangji nung tetsür tebur kecha balala mali, ajak kasadang, iba lima nungji, tanü, asenok alir.

OLEMSABANG

MESOATSÜ SOBALIRU ASER NAGA PUTIOTSÜ

~ Talitemjen Imchen

Mesoatsü NNC/FGN Intelligence Director retd. sobaliru aser Naga putiotsü (Mesoatsü NNC/FGN Intelligence Director retd. Biography And Naga History) kaket sayar külen küm ka jungogo (January 04, 2020 - January 04, 2021). Iba kaket azüngertem-i kanga jangrapangra azüngba den külemi, shiluyim (feedback) tajung agütsüba atema ajak dang kanga pelar. Iba kaket nung NNC/FGN Alee Command aoba indang, tongtipangsa 1963 küm East Pakistan aser 1966 küm China-i aoba indang zülü.

1963 küm East Pakistan Alee Command aortem Ao kin nungi, parnok 57 arangshi (training) agir adoker rongnung, aika taküm arishi tempanger tipu limai ogo. Ano karbo taküm lir. Taküm alirtem ji joko ajak küm 80 tema dang kumogo. Parnok taküm alirtem jagi, taor tenüngtem ji kar bilemtetba dak alaka, tarensen nungbo meshiteter. Saka Nokinketer A. Maken Imchen shiba East Pakistan Alee Command aoba mapang, Lieut. Gen 2nd Commander liasü, paibo ajakji tatongi shitet. Parnok 57 arangshi agir adoker rongnung, ni aibelena angazük asü pai tera repsema ashir, lutet 309 yongkok zünya 51 nung Samanükshi (Akhoya) masü Kilangnükshi (Changtongya) ta melenshidaktsüner. Tanü asenok den Nokinketer A. Maken Imchen taküm meliaka, pa ama tanishir tajung aser molungzüng (memory) zenket keter sotetba atema teti pelaa bilemer.

Kübu tanubo nunger ka, Wapong Chubamaong Imchen shiba küm 83 jungogo, East Pakistan Alee Command aortem telok telok lemsar arangshi (training) agiba rongnung, Wapong Kilangnükshi (Changtongya) parnok telok ka nung Medium Machine Gun (MMG) arangshi agiba bilemtetdang, ano lanuwa mapang ama kanga menungrar ta pai olen ka nung shisem.

Kasa kaket nungsa, lutet 251 nung Private Tozüngchiba (Chuchuyimpang) ta alibaji (Chuchuyimlang) ta melenshidaktsüner. Anüng nungi tsüjang ka tsüka tsüyim ana sadanga ayim ta kentet nung jembi ama, Chuchuyimlang aser Chuchuyimpang, yim anaji khenyongi balala. I o p na dang melenshi nung Chuchuyimlang aser Chuchuyimpang ta yim palala akümer. Yamaji julem (pen) amshirtem-i ni densema kanga tenük yoka amshitsüla.

Ano kasa kaket nungsa lutet 363 nung Sgt. Major T. Imkongyanger ta alibaji Sgt. Major T. Imkongmar ta melenshidaktsüner.

Kaket zülur ka asoshi otsü asüngdanga senzüdang, ajak kasa masüji telok kar asoshibo mesüra otsü karbo mamen. Temai adoka jembitsü majung. Item indang ponglang tashi shipoka zülutsü tasak. Iba jagi tezülur-i züdoker masü saka kenü zülutsü ocet yutsür. Ano kaket ka nung tatalokba ajak inokteter masüji, nükmen (subject) ya tongtipang ta ser züludang, onük karbo kanga apayuseta liaka, kaket nungji meinokteter. Ano tezülurtema, khien khienbo temang aser tekolok anibelemadoker aser azümesenadoker. Ibaji dang masü tasüngdangtsü tongtipangtem jungdak nungji marur. Khien khienbo tia majung otsü ashirtem jia, tezü atsür (mood majung) aliba mapang ajurur. Iba ama tensa nungji, pei bilemba ama mesüi, otsü junga bener maruteter. Ano khien khienbo otsü angaloker aser khien khienbo otsü tatongi shiaka, ajakbo mangazükteter. Shirnoki iba ocet angur nenoki kaket nungji temalen agütsüba ama melenshidaktsüner aser tarutsü adok tasenba nungjibo iba temelenshiba nung adokdang shinga meratatsü iba osangkaket ajanga sangdonger. Kanga dang pelar ajak dangi küm tasen salem.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Ethiopia nung Tenla ki ka amakdang nisung 750 shi tepset



Ethiopia kübok Aksum nung aliba Maryam Tsiyon Arogo tenla ki noksa nung angur. Iba Tenla kidang ozüng süngden lir ta aikati amanger.

January 20, 2021: Ethiopia kübok Aksum nung Maryam Tsiyon Arogo Tenla ki amakdang nisung Khristan aika asü; Tigray region nung tang teraradak mapang nung Ethiopia sorkari sepaitemi iba Arogo amak, ta osang angazüker.

Maryam Tsiyon Arogo-i ashiba agi, par Arogo ket nung ozüng süngden lir, ibayongji ozüng süngden agitsü nükjidong nung iba Tenla ki amak asütsüa akok.

Tenla ki kima moapu nung teraradak mapang nung kiyong nung alirtemji Tenla ki telung nungji atsüka liasü, ajisüaka parnok Tenla kidang nungi anizüker khaset.

Europe External Programme

with Africa, Ethiopian National Defense Force (ENDF)-i ashiba agi, "Ozüng süngden agir Addis Ababa-i bener aotsü nükjidong nung Maryam Tsiyon Tenla kiji amak asütsüa akok, ta yangji alirtemibo bilemer. Nisung noklang aika Maryam Tsiyon Tenla kidangji atsüka liasü, saka parnok kimai anizüker yimti tiyong nung khaset. Nisung ajak agi 750 shi khaset," ta metetdaksü.

Ano Ethipoia sorkar sepaitemi nisung kar tepsetba video-a prokshiogo. Iba region nung sepaitemi anti-communist insurrectionary force telok den rarar.

1991 küm Tigray People's Liberation Front-i iba linük nung

communist atsüngdokba sülen yimtenren atsünga liasü, saka tesülen iba telok loksa.

Ano communist insurrectionists aser ENDF na tsünga raraba mapang nunga nisung aika jenshia liasü.

UN OCHA report ajanga ashiba agi, "Tang iba linük nung nisung million 4.5-i rongdak teyari nüngdaker aser iba nungjagi nisung million 2.2 bo IDPs lir. Ajisüaka Mekelle camp nung nisung 77,000 aser Mai Ayni o Adi Harush refugee camps na nung nisung 25,000-i dang UN aser partners nungi teyari nguogo."

Iba region nung rara adokba sülen nisung aika tesem balalai jenshiogo.

ICC-i Nigeria linük nung lajartem nem teyari agütsür

Washington D.C, January 20, 2021 (Agencies): 2012 küm nungi tenzüka Nigeria kübok Benue State nung Fulani telungpurtemi Khristanem nem timtem kanga agüja arudar; telungpurtemi Khristan yimtsüngtem amaker, alu raksatsür aser Khristanem tepseter.

Telungpurtemi amakba mapang nung asürtemji timbaka taintem lir, anungji parnok chirnurtem kanga takoksa

angur, ibayongji International Christian Concern (ICC)-i küm aika item ama lajartem nem teyari agüja arur.

Yaküm coronavirus wara prokba sülen lajartem ano timtem taliba ajangshia aliba mapang nung ICC-i orphanage telok ka den senteper item lajartem anepalua liasü.

ICC-i tanurtem nem chiyungtsü, aben-süoshi aser merükmejudang amshiba oset

balala lema agütsü. ICC-i jang, menjang aser manü densema chiyungtsü tapu balala aika agütsü.

Orphanage Director-i, "United States of America nungi International Christian Concern teloki onok nem teyari agütsüba atema pelar. ICC ya onok teyarir tulutiba aser partner tulutiba lir. Parnoki onok atema aria bilemja inyakogo," ta metetdaksü.

Wenzhou Three-Self Churches nung aliba Kangkitem indoktsü

January 20, 2021: January 16, 2021 nü China kübok Zhejiang province nung linüki temelaba agüja aliba Three-Self church nung aliba Kangki kangshia indoktsüogo.

Wenzhou yimti nung aliba Chinese Christian Fellowship of Righteousness, Yongzhong Street Canghe Church nung putir, Francis Liu-i, Honibarnü sorkar ketdangsertemi tashiyim amshia parnok Tenla kidang aliba Kangki indoktsü, ta metetdaksü.

Iba sülen Arogoi police dang iba tatalokba bushisüngdangtsü mepishi, saka Wenzhou kübok Longwan District nung Public Security Bureau-i, Kangki samaba ken oji public security bureau's jurisdiction küboki maiter, anungji iba tatalokba bushisüngdang masütsü, ta ashi.

Ano külen iba Arogo anasa aliba Three-Self church-Yongzhong Christian Church nunga sorkar ketdangsertemi Kangki indoktsüogo.

China linük nung Khristan nütsüng jenti aliba yimtitem rongnung Wenzhou yimti densema lir. 2013-2014 küm Zhejiang nung sorkar ketdangsertemi Tenla kitem nung Kangki indoktsüba mapatong ka tenzüka sülen Wenzhou aser temeküt aliba yimtitem aika nung Kangki meyrjang aika indoktsü.

Iba sülen nungjagi tenzüka China linük tesem balala nung aliba Tenla kitem nungi Kangki indoktsüba manener.

ANO GO ABEN TSÜNGREM DEN

Ne kangki apuang

Mathi 16:24

Jenjang mesükshi ne kangkiji Tsüngremer mulungba lir. Kangki aputsübaji teshimetetba ka lir; ibai nai mokoktettsüba masü; ne tashi dak alia masü. Na temang nung timtem alitsü akok mesüra kibong nung tashi manga tanür alitsü akok mesüra sen-o-tzü tebilemtsü alitsü akok, saka itemji nai aputsüba kangki ta taitep. Nai ajuruba tia mesüra ne mapa nungi adokbaji kangki masü. Khristai tekümtet mapa inyakdang timatemba angati mulungsoa atenbaji ne kangki lir (Fil. 3:10). Pauli ashi pa timatemba nung pa pelar kechiaser pa timtem ajanga tangar Khrista dangi anir arutsü ta pai metetta liasü (Kol. 1:24).

Asenoki tangsa pei sasa azüoker Yisu sullen anitakner. Saka nai tama ne kangki mapura, nai Khrista sullen manidaktetsü. Tsüngremer Tekümtet mapa timtem ajanga dang ataloktsüba mapatem lir. Tekümtet agütsütsü asoshi Khrista timatemba ama, Tsüngrem asoshi tangar Tekümtet dangi anir arutsü asoshi na timatemtsüla. Yisui Pa nütsüngtemi Oaji Khrista ta memeteti tashi parnok den kangki indang mejembi (Matt. 16:21).

Nai Yisuji Khrista ta mangatet tashi nai kangki timtemji marenzüktetsü. Kodang nai Khrista den tesendaktep bentetdir, Pai ne dang ne kangki indang jembitsü.

Kangki medeni Khistan yimsü mali. Nai timtem kecha magidang Tsüngrem den tesendaktep kanera, nai Khrista yimya nung melitettsü. Na asoshi Tsüngremer mulungba nung kangki dena lir. Tamasa ne kangki apuang; idangji nai Pa sülen anidaktetsü.

Gujarat state sorkari Anti-Conversion ozüng tasen ka benoktsü

January 20, 2021: Tawa BJP-i yimsüsüba state ana nung anti-conversion ozüng agizüka benokba sülen Gujarat state sorkaria anti-conversion ozüng tasen ka benoktsü tebilemba lir, ta International Christian Concern osang ajanga metetdaksü.

State sorkari ashiba agi, 'love jihad' anema sorkari anti-conversion ozüng tesashiba ka benoktsü atema shisadangdar.

2003 küm nungi tenzüka India kübok state ishika nung anti-conversion ozüng benoka liasü, aser item states rongnung Gujarat densema lir.

Gujarat Freedom of Religion Act, 2003 ajanga ashiba agi, tashiyim amshia tamangba yimsü meyipdaksüba, mesüzüka mesüra ashikülak ajanga tamangba yimsü meyipdaksübaji ozüng alema lir.

Gujarat nung iba ozüng ano tesashiba benoktsü atema state sorkari department balala dang anti-conversion ozüng tasenbaji asadangtsü tuyuogo.

"Tang aliba ozüng ajanga meimteptsü mesüra kibong akümtsü atema kangshia


yimsü tamangba meyipdaksürtem nem temerenshi agütsür, ajisüaka ano ozüng tesashiba benoktsü atema state sorkari MLA tem aser lokti tentet balala dang nungi tebilembatem asüngdangogo," ta osang ka ajanga metetdaksü.

Tawa Uttar Pradesh aser Madhya Pradesh na nung anti-conversion ozüng tasen agizükogo. State anaprong ya BJP-i yimsüsüba state tem lir, aser parnoki ashiba agi, iba ozüng ya 'love jihad' aser kangshia tamangba yimsü meyipdaksüba mapatem anema lir.

Hindu yimsü alia amangertemi, Khristanem aser Muslim nungeri Hindu nunger, talisa sensakertem mesüzüka mesüra kangshia tamangba yimsü meyipdaksür, ta aitsür.

Tang India nung anti-conversion ozüng balala benoka aliba state temji Odisha, Uttar Pradesh, Arunachal Pradesh, Chhattisgarh, Gujarat, Jharkhand, Himachal Pradesh aser Uttrakhand state tem lir, aser item ozüng nung ajemdaker parnoki Khristanem anema inyaker.

OLONG PAITEP # 5700



TIPIEN

1. Balaka
6. Aika shirangba
7. Tar tatsü
9. Nenü'er jabaso
10. Sen latettsüba
11. Tangar kübok alir
14. Lon nung inokba
15. Tzü ayimdak
16. Ajok

LANGTSÜNGLEN

2. Hai sür inyak
3. Aor tenüing ka
4. Ali telungi talangka lur
5. Tebang kenyonzi mazüoker
8. Ken atema anenzükertem
9. Toktepa noktak
10. Sen
11. Benjong agi
12. Telung nung rizünga ayu
13. Tebang nung enok

OLONG PAITEP # 5699 TELANGZÜBA

TIPIEN :

1. Aben, 4. Artsü, 7. Lisem, 8. Liwa,
9. Sarasadem, 12. Aket, 14. Mangu,
15. Anünü, 16. Ango.

LANGTSÜNGLEN :

1. Aruli, 3. Balala, 5. Suwar, 6. Belem,
9. Sükak, 10. Aonung, 11. Dokan,
13. Tinu.



CLASS ROOM NUNG :

- Missla** : Tanepbo mental ongkho asüngdangdi, Sobangba küt nung sen 100 alinung..
- Alokba** : Haeet, Miss ataangjo, Sobangbai kü dang küm tetenzükleno sen 20 apuba tang tashi magütsü, Sobang tang sen 20 ji kwa, saala.
- Missla** : Alokba aji tatishitsü ka ashir dangaja, na odang ataang. Sobangba küt nung sen 100 aliba nungi sen 50 agi Ice cream achi nung pa sen kwi anüngtsü?
- Polokba** : Sobangba küt nungji sen 30 dang anüngtsü kechiba süra kabor Alokba jagi sen 20 ji khangzüksübasä.
- Missla** : Oh my God!!

Lilir : WhatsApp

TANÜBO NAI LANGZÜANG

Q. India nung mezüngbuba süa "Labour Movement Museum" koba state nung lapoktsüba lir ?

- a) Tamil Nadu
- b) Kerala
- c) West Bengal
- d) Andhra Pradesh

===== (Taruba adok nung onoki langzütsü)

YASHI ADOK TELANGZÜBA : Ministry of Finance



Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Tepela Tasoba Anogo



1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NAI-A YA METETTER MA?

TANG FOOTBALL ASAYAR SEN TIEMTIBA
ANGUR PARNOK TER YAMAI :

PLAYERS	CLUB	TOTAL INCOME (IN \$)
Lionel Messi	Barcelona	126 million
Cristiano Ronaldo	Juventus	117 million
Neymar	PSG	96 million
Kylian Mbappe	PSG	42 million
Mohamed Salah	Liverpool	37 million
Paul Pogba	Manchester United	34 million
Antoine Griezmann	Barcelona	33 million
Gareth Bale	Real Madrid	29 million
Robert Lewandowski	Bayern Munich	28 million
David de Gea	Manchester United	27 million

SUDOKU # 5741

TELANGZUBA # 5740

	2		8	7	3	5			1	5	2	9	6	4	3	8	7
3	5	6			9		7	4	4	9	6	8	7	3	5	1	2
			5	6	4		3		3	7	8	1	5	2	4	6	9
		4				1			6	1	3	7	9	5	2	4	8
7			9	5		2			5	4	7	2	8	6	9	3	1
2	3				6	9		5	8	2	9	3	4	1	7	5	6
	1	2				3	5		2	6	5	4	1	7	8	9	3
9		3			5		4		7	8	4	6	3	9	1	2	5
8	4				2	7	9	1	9	3	1	5	2	8	6	7	4

OJANG LUTEP # 5288

OKIRSHNI	:	
KOTAK	:	
ERAS	:	
JUNTAG	:	
NGDA	:	
LAAYIM	:	
IRLID	:	
RNOKPAJI	:	
SHITAMA	:	
TSASÜÜ	:	

OJANG LUTEP TELANGZÜBA # 5287

SENTONGTEM JELIA MEYANGLUI JONGTAK NUNG ARITEPA
INYAKBA AJANGA MAPAREN RAKSATSÜR

TAN HOPTA ATEMA - KOMA SÜLA ?

Q. Asenok kidang kilir ayuba yimya ya anen nunga koma süla ?

Olong 20 shi nung January 22, 2021 tashi nung iba telangzüba ya onok dangi (e-mail - tiryimiyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.

India-i Bhutan linük nem covid vaccine lakh 1.5 angati agütsü



January 20, 2021 nikongdang Thimphu yimti nung Bhutan Ato kilonser, Lotay Tshering (ajichilen nungi tanabuba)-i coronavirus vaccine agizükba noksa nung angur. India-i Bhutan linük nem coronavirus vaccine lakh 1.5 angati agütsüo.

Mumbai, January 20 (Agencies): India nung yangluba COVID-19 vaccine 'Covishield' tang mezüing Bodhbar anepdang Mumbai nung aliba Chhatrapati Shivaji Maharaj International Airport nungi Thimphu (Bhutan) dangi yokogo.

Sorkar osang ka ajanga ashiba agi, Covishield vaccine dose lakh 1.5 ji Bodhbar nikongdang Bhutan yimtiba, Thimphu tongogo.

India nung Serum Institute of India (SII)-i yangluba coronavirus vaccine ya sempet ka amai India-i Bhutan linük nung tama agütsür.

Coronavirus anema tenokdangba balala aliyonga India-i Bhutan linük nung nüngdakba osetsüset maneni yokdar, aser iba ya India-Bhutan tesendaktep junga aliba ajanga lir.

Mongolbar anepdang Ato kilonser, Narendra Modi-i twitter ajanga, "Alima nung anema-alibaren tsütsü India ya mapang talangka nungi melung lemtetba partner ka lir. Asüing nungi tenzüka linük aika dangi coronavirus vaccine yoktsü," ta metetdakja liasü.

Covid wara mapang nung India -i Bhutan nem sen crore 2.8 jenjang paracetamol,

hydroxychloroquine, PPEs, N95 masks, x-ray machines aser test kits agütsüo.

Ano külen Mongolbarnü Ministry of External Affairs (MEA)-i sangdong ka ajanga, kidanger linüktem aser tongtibang partner linük aikati India dang linük nung yangluba vaccine yokang ta mepishiogo aser item linüktem rongnung Nepal, Bangladesh, Myanmar, Bhutan, Maldives aser Seychelles densema lir, ta metetdakja liasü.

India-isa Sri Lanka, Afghanistan aser Mauritius dangia vaccine yoktsü atema jembidar.

Telangana nung Health Worker ka covid vaccine agiba sülen asü

Pune, January 20 (Agencies): Telangana kübok Nirmal district nung arrshi küm 42 healthcare worker ka Covid-19 vaccine agiba sülen pa teku nung tashitsü atu, aser Bodhbar anepdang yakta süogo; ajisüaka health ketdangser katibo, pa asübaji coronavirus vaccine atuba den sendaktepa mali, ta metetdaksü.

Mongolbar anüingdang 11:30 ako meta Nirmal nung aliba primary health centre ka nung pa nem coronavirus vaccine tuja liasü aser Bodhbar anepdang züingia 2:30 ako nung pa teku nung tashitsü atuba sülen pa hospital-i anir arudang 5:30 ako meta asü, ta state Director of

Public Health, G Srinivasa Rao-i sangdong ka ajanga metetdaksü. "Mezüing bushisüingdangba ajangabo pa asübaji vaccine agiba den sendaktepa mali, ta bushitetogo," ta Health ketdangserisa metetdaksü.

Inyakyim nung aliba ama doctor team kati post-mortem agitsü.

District AEFI (adverse events after immunisation) committee-ia iba tatalokba asadangdar aser kobi melii parnoki state AEFI committee nem report agütsütsü, ta sangdong nung shia lir.

Iba sülen state AEFI committee-i central AEFI panel nem report agütsütsü.



New Delhi, January 20, 2021: Aluyimba ozüing tasen asem anema aluyimertemi longkak aitiba dak sendakba nung Bodhbarnü Vigyan Bhawan, New Delhi nung aluyimer lenirtem aser Centre na tsüingda senden 10benbuba amendang tangokba noksa nung angur.

Kerala assembly election April ita nung agitsüa akok: Kerala CEO

Thiruvananthapuram, January 20 (Agencies): Kerala nung Chief Electoral Officer-i benokba Election Commission of India (ECI)-i agizükra state nung Assembly elections April ita tetenzüklen mesüra ita tomlen agitsüa akok, ta osang ka ajanga metetdaksü.

Election Commission dang Kerala CEO, Tikkaram Meena-i, Ramzan temeshi ita aser CBSE Board tatidang aliba nung ajemdaker state nung assembly election April ita tetenzüklen mesüra ita tomlen agitsü mepishia metetdaksüo.

Meena-i, "April ita tom matongdang election agitsü junger, kechiyong Ramzan

temeshi ita April tom nungi May ita tashi lir. Iba dak alia CBSE board exams May 4 nungi lir, anungji election menor agira polling station ama amshitsü atema school building agi meperitsü," ta metetdaksü.

EC nungi tongti ketdangsertem team kati kobi melii Kerala semdanga yimtenren party balala nungi züingsemtem, sorkar ketdangsertem aser election ketdangsertem den state nung assembly election agitsü atema o lemteptsü.

State nung election shilem ana küma lemsar agitsüa akok aser iba atemaji EC nungi ketdangsertemi yimtenren party

tem aser stakeholders den o lemtepsa sülen telemtepsa agitsü, ta tongti ketdangser kati metetdaksü.

Meena-isa, assembly election agitsü aliba state pongu-Kerala, Tamil Nadu, West Bengal, Puducherry aser Assam nung election agitsü anogotemji February ita tatembanglen sangdongtsü, ta metetdaksü.

Tamalenbo Kerala nung election anogo ka nungdang agia liasü saka state kübok Kasargod, Kannur, Kozhikode aser Thrissur den Malappuram districts kübok tesem kar nung tensa kanga raksaba agi takümba election anogo ana agitsüa akok.

Shibai Balakot osang Arnab Goswami nem metetdaksü?: Rahul Gandhi

New Delhi, Aenjeti/January 20 (Agencies): Republic TV editor, Arnab Goswami WhatsApp nung chat asüba yimjak nung angubaji 'linük anemba' lir, ta aija Congress MP, Rahul Gandhi-i, security establishment rongnung shibai Balakot amaksü miim osang jelia Arnab Goswami nem metetdaksü, ta asüingdang.

Iba osang prokbaji ajanga Pakistan nunger kümküma Indian Air Force sepaitemi takoksa ajurula, ta Congress lenirisa ashi.

Iba ya ozüing alema inyakba mapa ka lir, ajisüaka iba tatalokba atema Arnab Goswami anema bushisüingdang masütsü, kechiyong miim osangji tongti ketdangser kati Goswami nem metetdaksü, ta paisha ashi.

Rahul-i, "Goswami indang WhatsApp nung iba osangji lira Pakistan nungeria meteta lir. Iba osangji Ato kilonseri Goswami nem metetdaksü asü?, defence minister mesüra NSA mesüra home minister-i metetdaksü asü?, ni ibaji metetner. Iba ya ozüing alema inyakba mapa ka lir. Osang agütsüsang aser osang agizüksang naprongla jail nung puoktsüla," ta shisem.

Ano külen Congress lenir, A K Anthony-ia, sepaitem operations miim osang tema nung prokbaji linük anema

inyakba mapa lir anungji iba nungji shilem agia alirtem nem temerenshi agütsütsüla, ta metetdaksü.

"2019 küm airstrikes atema miim osang prokbaji bushisüingdangtsü atema sorkari tuyutsüla. Military operations agitsü atema miim osang prokbaji linük security onük ka lir aser linük anema inyakba mapa lir. Miim osang prokba nung shilem agia alirtem nem temerenshi agütsütsüla aser aibelenertem dang taochi sayutsü metemsü," ta Antony-i ashi.


Congress lenirtemi dang masü saka Left lenirtem-Sitaram Yechury aser D Raja natia WhatsApp chat prokba ken o nung sorkari tang tashi ola madokba atema sorkar aitsü.

CPM general secretary, Sitaram Yechury-i, linük security amokmeren nung sorkari shilem agia lir asü, ta asüingdang.

CPI tongti, D Raja-i, "Ato kilonser dang masü saka defence minister Rajnath Singh-ia iba onük nung ola madokba atema ni süngmanger, kechiyong pai (Modi) India nunger security atema aiben jembia arur, saka sepaitem miim asalentong TV channel ka nem metetdaksüba onük nung tangbo pai ola madoker. Modi-i linük nem telangzüba agütsütsü sentsüh lir," ta ashi.



New Delhi, January 20, 2021: Bodhbarnü New Delhi nung Defence Minister Rajnath Singh mendenbuba ser 5buba India-Singapore Defence Ministers Dialogue nung adenba noksa nung angur. Kasa noksa nung Defence Secretary Dr. Ajay Kumar-a angur.



Washington nung aliba Lincoln Memorial Reflecting Pool nung COVID-19 memorial sentong ka agidang Archbishop of Washington, Cardinal Wilton Gregory-i sarasademba mapang US Tir inyaksü shimteta alisang Joe Biden aser pa kinungsü Jill den Vice President inyaksü shimteta alila Kamala Harris aser la kinungbu Doug Emhoff nung nokdaka aliba noksa nung angur.

Thailand chubayimli busemertemi political party ka tentet

Bangkok, Aenjeti/January 20 (Agencies): Lanurtemi anir chuba yimli nung temelenshi arudaktsütsü atema longkak aitiba mapang Thailand nung King Maha Vajiralongkorn bukmutsü atema political party tasen ka Bodhbarnü tenzükogo.

"Thai Pakdee" (Loyal Thai) party ya kasa tenüng nung taoba küm August ita tentetba royalist telok ka lir, koba chuba busema yimtung nung longkak aiter anema rally agia liasü.

Iba party tasenba ya yimten yimsüsür tejen, Warong Dechgitvigrom-i anitsü aser chuba yimli laodaktsütsü tebilemba aliba political telok den raratsü, ta pai ashi.

"Asenoki kumzüka mayudang tanü asenoki rara sangdonger, chuba yimli kumzüksü atema asenoki raratsü," ta Warong-i osangbener senden ka nung ashi.

Chuba yimli laodaktsütsü ya par nükjidong ta tai tongloksüba longkak aitiba lenirtemi magizük aser democracy den apet kumdaktsüner, ta nenshia shia arur.

Opposition party tejangja, Move Forward aser par den sendaktepa aliba Progressive Movement group aser lanurtemi aniba teloktem, koba dang "the three-finger mob" ta ajar, item ya par party indang yimtenren tsütsü tsükchir

asütsü, ta Warong-i ashi.

Warong-i sangdong ka nung ashiba agi, par party ya tejangja telok mesüra businesses katia busema mali aser ibai nübur meyong asütsü.

Pai züngsem danga kata mashi saka election commission nem iba telok tentetba indang metetdaksüogo aser tekeratiba nung executives shimtsü, ta ashi.

"Tangatetba tajung nung tenzükaka chuba yimli kumzüksü atema jembia party ka tentetba ajanga chuba yimli ya yimtenren tatsütepi aitaaktsütsü," ta Progressive politician Piyabutr Saengkanokkul-i tekümdangtsü shiogo.

Dutch sorkari World War II sülen curfew mezüngbuba benoktsü

Amsterdam, Aenjeti/January 20 (Agencies): Netherlands nung coronavirus mutations tasenba prokshia aoba ajemdaktsütsü mechi lockdown benoka alidak linük ajunga nung World War II sülen mezüngbuba curfew Bodhbarnü benoktsü renema lir, ta sangdong ka ajanga ashi.

Iba curfew nung tongtipang nungdak aliba nisungtem dang Hokulbar aonung tashi nikongdang 8:30 ako nungi anepdang 4:30 ako (par mapang) tsüingda kidang nungi ayazüktsü melatsü, ta sorkar osang ka ajanga ashi.

December ita tiyonglen nungi school aser tongtipang masüba dokan tem shibanga lir aser aji masüadang ita ana tejakdang bar aser restaurant tema shibanga lir.

Iba lockdown ya tatsütiba agi February 9 tashi alitsü, ta Ato Kilonser Mark Rutte-i taoba hopta shia liasü.

World War II mapang German nungeri Dutch nung curfew benokba sülen tang mezüngbuba benokba curfew nung tashishitsü jenti lir aser political party balalai anema nokdaktsü, ta shia lir.

Bodhbarnep sorkari curfew aser danga meratem atema jembir aser iba telemtetba ya nikongdang metetdaksütsü, ta

ashi.

Iba sülen parliament-i iba mera busemtsü atema 1500 GMT ako meta o intep tenzüktsü imlar. Saka curfew ya opposition telok medeni benoktsü akok.

Britain aser South Africa nung mezüng putetba virus tabu tasenba ya prokshia aoba ajemtsü atema sorkari item linük nungi senzüsemponger tem nokdangtsü atema sorkari asadanger.

Taoba hopta asem tsüingta Netherlands nung coronavirus tashidak menatepa aoba ajema kumogo saka social distancing yimya ya akhanga meyanglushira virus tabu tasenba yagi ano asendenshir linük asüngtsü, ta health ketdangsürtemi ashir.

Tang Dutch sorkar nung caretaker jenjang ka lir, kechiaser taoba Hokulbarnü Rutte-i pa mapa nungi anenba King Willem-Alexander nem agütsüogo. Rutte'er cabinet ajanga childcare subsidies junga ketdang masü ta osang prokshiba sülen pai iba mera ya agia liasü.

March 17 nü election agiba sülen sorkar tasen ka metentet tashi COVID-19 policy tem atema telemtetba agitettsü, ta Rutte-i ashi.

Donald Trump-i nisung aika nem tatok agütsüogo



Washington, Aenjeti/January 20 (Agencies): US Tir Donald Trump-i pa office nung tatemsaba amendang nisung aika nem tatok agütsüba rongnung taoba White House ketdangsür Steve Bannon dena lir, saka pai pa, par kinunger mesüra okatsür Rudy Giuliani nung nem tatok magütsü.

Bodhbarnü Joe Biden ya linük indang tir tasenba ama tenangzüktep agiba mapang Trump-i office yutsütsü. Trump-i pa mesüra par kinunger nem tatok magütsütsüla, kechiaser yamaji inyakba ajanga parnoki aibelen ali ama ajitsü, ta White House nung ketdangsürtemi ashi, ta iba tensa indang meteta alir osang ka ajanga ashi.

2016 küm Trump-i tir election nung toktepba mapang Bannon

ya adviser tongti ka liasü aser US-Mexico arrtsü jara yanglutsü atema nijaren nungi senotsü bendentsü meranga tir busemer ashioaktsüba ken o ka taoba küm pa anema benoka liasü. Pai aibelen mali ta nangzük.

"Conservative movement nung Bannon ya lenir tongtipang ka ama shilem agia aru aser yimtenren tsütsü telemtetba tajung agiba atema ajaki meteta lir," ta White House-i sangdong ka nung ashi.

White House ketdangsürtemi Trump dang Bannon nem tatok agütsütsü ashi. Kuli tejangja magütsüteti taoba küm tir election mapang ashikülak mapa inyakta Trump-i jembiba nung teyari bushiba mapang tena tsüingta tesendaktep yanglushi, ta osang

ka ajanga ashi.

Nisung 140 dak tema nem tatok agütsüba rongnung Trump-i Elliott Broidy nema tatok agütsü, shiba taoba mapang Trump atema senotsü bendentsür tejangja nübu ka liasü. Pai yimtenren tsütsü bendanger den sentong balala benoka asayaba ozüing nung aibelen ta taoba küm nangzüka liasü, aser ano taoba mapang Detroit Mayor inyaka alisang Kwame Kilpatrick nema tatok agütsü, shiba ochimashi ken o nung aija küm 28 asoshi tepuokdak yua liasü.

Rap kentener Lil Wayne aser Kodak Black na nema tatok agütsü. Tena ya ozüing alema prangbong amshiba ken o nung aija liasü.

Trump-i 2020 tir election meyipshitsütsü merangba nung yakbang sür inyaksang Giuliani yabo mapa tamajung inyakba atema ken o benoka mali, saka pai Ukraine nung inyaksangshiba indang bushisüngdanga arur.

Tir busemertemi January 6 nü US Capitol telungi ia rongrong agütsüba maparen ajungmesoba ken o nung Democratic teloki anir aliba House ajanga taoba hopta Trump aitsü. Iba ken o ya Senate nunga jembitsü akok,

aser yangji aitsüra tarutsü nung tir menden atema toktepba nungi nokdangtsü.

Tatok agütsüba tashi ya US Constitution nungi aruba lir, aser tir atema tashi tulutibaji iba ya ka alitsü. Aiben temerenshi agüja alir nem tatok agütsür, saka ano ken o mejembi alir nema tatok ya agütsüteter.

Tatok agütsüba ya sorkar nung danga kongsang temi tanaben lepa mereprangtettsü aser tatok agütsüba atema tiri kuli agütsütsü menüingdak. Saka tatok agütsüba tashi ya ajak atema masü, ibai federal nung mapa tamajung inyaker atema dang lir.

Yimtenren tsütsü külem pur nem Trump-i taochi sayur rongnung arishi küm 67 tain Bannon ya ka lir. Trump-i iba tashi ya pa sülen anidaker den amshi aser pa tsükchirbo merenshia aru.

Taoba National Security Adviser Michael Flynn-i taoba Russian ambassador den sensaksemba indang FBI dang tiazü jembiba nunga Trump-i tatok agüja liasü aser Roger Stone tepuokdak ayutsü kümsüka ajemtsü, shiba 2016 tir election nung Russia-i teka amuokba indang bushisüngdanga mapang Congress den tiazü jembiba

nung aija liasü.

Right-wing news outlet, Breitbart indang taoba executive chairman aser co-founder, Bannon yagi "America First" right-wing populism wangshia akumba nung shilem tulu agia liasü. Trump-i tir kumli immigration anema sentong tesashi yangluba nunga pai shilem tulu agia liasü.

Pa ya White House mapa nungi 2017 küm August ita anenja liasü.

2016 tir election nübuyim mapang Trump atema senotsü bendentsür tongti, Broidy ya China aser Malaysia nung tejangraba tenüng nung administration puatsü merangba nung aibelen ta October ita nangzüka liasü.

Arishi küm 38 tain Lil Wayne, shiba tenüng shidakbabo Dwayne Michael Carter Jr. lir, paia ozüing alema prangbong amshiba atema federal court nung December ita tai nangzüka liasü aser tepuokdak küm ter tashi ayutsü obendang agütsür liasü. Pai Trump indang criminal justice reform busema aru.

Arishi küm 23 tain Kodak Black, shiba Bill Kahan Kapri nung aso, paia prangbong alitsü atema kuli tiazü agütsüba mechi federal prison nung lir.

Tenyiphe-I nung kitsük kirong lendong atalok



Tenyiphe-1, BKhel, 6th Mile, Dimapur nung mibenertemi mi temsepba noksa nung angur.

Dimapur, Aenjeti/January 20 (TYO): January 19 anepdang 04:51 akok nung Tenyiphe-I, B-Khel, 6th Mile nung ki ka

aronga osang angazükba sülen Fire Station Chumukedima nungi Fire & Emergency Services team ka mi abeni ao.

Fire Tender ana den hadir teperi bener mibenertem mi adoka aliba tesemi ao.

Iba lendong nung katcha ki ka rongtokogo. Mi temseptsü atema mibenertemi minute 20 shi agia liasü. Mapang shidak nung telangzüba agütsüba ajanga mi ya tanga tesemi rongyonga meyoki temseptetogo. Mi lendong nung sen lakh 1.5 alang osettsüt rongtoka liasü. Mi ya electrical short circuit ajanga adok asütsü ta temulung melemi bilemer, ajisüaka nisung tasübo osangbo kecha mali. Mibenertem ya Duty Commander S.I Kenyuyhun Kent lenisüba kübok ao.

Triple Rear Camera aketba Vivo Y31 India nung sayaogo

Aenjeti/January 20, 2020 (Agencies): India nung Vivo Y20G sayaba sülen anogo ka lir Vivo company-i Vivo Y31 ta nungja agütsür smartphone ka sayaogo. Phone anaprongla nung triple rear camera keta lir aser sen jenjang kasashi dang lir. Vivo Y31 nung tongtibang feature tem rongnung Qualcomm Snapdragon 662 processor aser 5,000mAh battery ka densema lir.

Iba phone ya Vivo Y30 den tatongtep phone asütsü koba taoba küm May ita Mediatek Helio P35 SoC aser quad rear cameras keter sayaa liasü. Vivo Y31 smartphone tem ya company indang Greater Noida facility nung yanglur.

Vivo Y31 6GB + 128GB storage model ya sen 16,490 agi angutsü. Phone alinertemi Vivo Y31 ya Racing Black aser Ocean Blue sentsü nung Vivo official online aser offline

channel ajanga alitetsü, ajisüaka phone kodang nungi ayoktsü iba indang osang tejangja agüja mali.

Maneni iba phone ya Amazon, Flipkart, Paytm, aser tanga partner retail stores tem nung agutsü. Vivo-i ashiba agi, HDFC Bank credit aser debit cards amshia phone alirtem nem regular aser EMI transactions mapang sen shilem 10 agi tajemba agütsütsü. EMI options ya Bajaj Finserv cards, ICICI Bank nunga angutsü. Kasa mapang nung Vivo Y20G 6GB + 128GB storage variant jenjang India nung sen 14,990 asütsü.

Vivo Y31 nung 6.58-inch full-HD+ (2,408×1,080 pixels) IPS display den waterdrop-notch aser narrow bezels keta lir. Phone nung octa-core Qualcomm Snapdragon 662 processor den 6GB RAM aser 128GB onboard storage (expandable upto 1TB) keta lir.

Phone yagi dual-SIM cards (nano) support asütsü aser OS ji Android 11-based Funtouch OS 11 lir.

Phone nung rectangular rear camera module ya vanilla Vivo Y20 den kasa lir. Tesülen camera setup nung 48-megapixel primary camera den f/1.79 aperture aser 2-megapixel camera ana den f/2.4 aperture keta lir. Selfies, atema phone tejaklen 16-megapixel camera ka den f/2.0 aperture inokja lir. Camera app nung portrait, panorama, live photo, slo-mo, time-lapse amala modes tem keter arutsü.

Tanga tongtibang features tem rongnung dual-band Wi-Fi, Bluetooth v5.0, 4G LTE, GPS, aser fingerprint scanner densema lir. Vivo Y31 nung battery tashi 5,000mAh asütsü koba USB Type-C port ka ajanga charge asütsü. Phone tozük grams 188 asütsü.

'Master' Co-producer-i compensation crore 25 meshir

Aenjeti/January 20, 2021 (Agencies): Tamil action thriller movie 'Master' January 13 nü sayaogo. Iba film nung Thalapathy Vijay-i tongti shilem agir, ajisüaka tia maka movie mesaya tsüngda movie indang clip ka temai adokogo. Pinkvilla sangdong ka ajanga ashiba agi, iba mapa inyaksang jangjaogo aser pa aser par company anema police ket nung ken o ka benokogo. Iba tatalokba ajanga film yanglur tezüdangdaksüogo aser parnok iba nisungba indang company dang nungi sen crore 25 compensation meshiogo.

Osang ajanga ashiba agi

movie clip ya movie sayatsü anogo ka lia tema adok. Iba mapa ya digital company ka nung inyaker kati inyak shiba ket nung bendangleni yoktsü aliba movie indang copy ka liasü. Seven Screen studio co-producer Lalit Kumar-i iba digital company dangi osang yokogo.

Master film nungsa Vijay Sethupathi, Malavika Mohanan, Shanthanu Bhagyaraj, Andrea Jeremiah, aser Arjun Das nungeri tongtibang shilem agir. Lokesh Kanagaraj-i direct asüba film ya Delhi, Karnataka aser Chennai nung tangoka liasü. Film ya mezüngbo taoba

küm April ita 9 nü sayatsü liasü saka coronavirus wara pokteta linük ajunga mokdanga ayuba sülen thinentsüsa aküm. Maneni Master film dubbed version tem Telugu, Kannada aser Malayalam nung sayaogo.

Film ya tanur kati par kinungertem tebu anemer kati rongseta südaktsüba anguba meketa yangluogo. Movie tatemi iba nisungba yagi par kinunger tepsetertem mang ayanger. Film nung nisungba liyonga aoba indang otsü tejangja sayur. Iba movie ya Lokesh den yaritepa Rathna Kumar-i zülü.



Armed forces nung adentsü atema jangraa aliba Mokokchung aser Longleng Districts nungi lanurtem atema Assam Rifles Mokokchung Battalion-i awareness/ registration drive ka ayongzüka katsüogo aser Rangapahar Military Station, Dimapur nung March 10 nungi 20 tashi agitsü aliba Army recruitment rally atema renemshia alitsü atema lanurtem nem pre recruitment training agütsü tenzükogo. Iba raining camp nung tebur 58-i shilem agidar. Lanurtem career yangluba nung teyari agütsütsü aser linük yanglurba nung shilem agidaktsütsü temulungdang yur iba training agütsüdar.

SÜR KÜM KA ABENSAR Tsürapur Chidensangla (Kangtsüng)

Onoki teti meima aliba ojala, akümüli wadang tempanger küm ka süitema ogo. Oda tanü tashi onok mulung nung la menürem tejak aser temeim bilemteta anisüngzüker.

~ *Temeim Chirnurtem, Semchirtem, Anükapang aser Kinungertem.*



Mulungnen O



ASO
30/07/1935

ASÜ
12/01/2021

Tsürabur Late **Mongyang Ao** (Changki), January 12, 2021 anogo, akümüli wadang renemer teti anisüngzükdaki ogo.

Onok shisa bulua mangyim tia nung alidang, kija, kibong, arogo aser lokti balalai tamang sarasadem, nübu, shisatsü aser rongsen agi nungita yariba atema nenok ajak dang pelaba lemsateper.

Teyanglur Tsüngremi nenok ajak moajangma.

Temeim Kinungtsü, Chirnur, Semchir aser Kinunger

Mulungnen O



ASOBA
4.6.1953

TASÜBA
17.1.2021

"Kechiaser ni asoshi taküm alibaji Khrista, aser tasütsüji tajangzük lir."
- Filipi 1:21

Kodanga amatsü makokba ozü temeim Ojala, asür **Mrs.Latongmongla**, Chuchuyimlang, la shiranga aliba anogo nungi asü pila anogo tashi nung kija, kibong aser lokti balala kwikati nübo aser sarasadem den ali rongsen agi yaritepogo, nenok ajak dangi tsüngdong arua pelaba lemsatepner saka mapang aser tensa agi memela nung, iba osang kakat ajanga nenok ajak den pelaba lemsateper. Tsüngremi nenok moajangma ta ozü tamang sarasadem südi.

Ojala dak nungi anguba sempetji temeem, aria bilemba, tejungnü aser menürema ajak den kasa liromedema litetba, tamang sarasadem la sübotsü kümmer, ochi agi nangri kanger, akümüli rara tajungji raaogo, lai alizüng tonga asemogo, anungji onoki teimla makaba purtem-ama malir

~ *Temeim Kinungbo, Chirnurtem, Semchir aser Kinungertem.*

Kohima DC-i kilen saru agütsütsü metetdaksür

Dimapur, Aenjeti/January 20 (TYO): Kohima Deputy Commissioner Office ajanga Kohima Sadar Areas Gaon Bura ajak dang 2020-2021

atema kilen saru Febuary 25 matong tsüngda DC office nung agütsütsü atema tetuyuba agütsüogo.

Atakzükja aliba mapang tashi nung kilen saru magütsüra House Tax Commission inyakyim nung aibelen ka asütsü aser mapa shidak minyakba GB tem merenshitsü.

Kilen saru ya GB temi sarutsüla aser teküboklen agüja aliba format dak ajemdaker ketdangsürtem nem agütsütsüla.

Format yamai alitsü:

1. Village/Ward tenüng;
 2. Block (Area);
 3. Gaon bura tenüng;
 4. Period from (Month and Year);
 5. Kilen:
- Sl. No. Name of Head of Household; Village/Town; House No; Amount.

G.Rio Memorial Tournament: Mokokchungaser Dimapur nati takokangu



Mokokchung team nungi century yanglur (tabelen)Mughavi aser Nripen Rai (tachichi) na tangokba noksa nung angur.

Dimapur, Aenjeti/January 20

(TYO): Tang asayaa aliba 1buba G.Rio Memorial U-19 (Boys) Inter-District Tournament tanü asaya nung Mokokchung aser Dimapur nati takok nguogo.

Mezüngbuba asaya Mokokchung aser Tuensang na asayaa liasü. Iba asaya Mokokchungi run 108 agi kokogo.

Toss akokba sülen Mokokchung team-i mezüng bat asütsü shim aser parnoki over 22 nung asayar ka danga

out mesüi run 216 yanglu.

Mokokchung team nungi Nripen Rai-i out mesüi run 108 aser Mughavi-ia out mesüi run 100 yanglua liasü.

Asaya tanabuba shilem nung Tuensang team-i over 22 nü asayar 9 out ser run 108 dang yangluteta asaya makok.

Parnok rongnungi Rajesh Das-i out mesüi run 30 aser Monu-i run 28 yanglu.

Mokokchung bowler tem rongnungi Purtongzuk-i wicket 3, Neizekho-i 2 aser Temsulong-ia wicket 2 agi.

Tanü asaya tanabuba Dimapur aser Kohima na asayaa liasü. Iba asaya Dimapur-i wicket 9 agi kokogo.

Mezüng bat asütsü shimba sülen Kohima team-i over 22 nung asayar 9 out ser run 81 yanglu. Parnok rongnungi Zayie Kikhi-i run 17 aser Dagbachu Thupithor-i run 15 yanglu.

Dimapur team bowler tem rongnungi Keduowhetuo-i wicket 3 aser Renben N. Odyuo-i wicket 2 agi.

Asaya tanabuba shilem nung Dimapur team-i over 8.2 nung asayar ka out ser run 82 yanglua asaya wicket 9 agi akok. Dimapur team batsmen tem rongnungi Yugandhar-i (WK)-run 36* aser Sujal-i run 10* yanglu.

Kohima team atema wicket ka ya Kelhousilie Zaputou-i agi.

Tang tashi nung Dimapur team-i Group A nung asaya asem koka parnok temaba jenjang nung lir aser parnok final atema qualify süogo.

Group-B (Peren, Wokha, Zunheboto & Mon) league asaya January 22 nü nungi tenzüksü aser Group-B nung temaba jenjang nung tembangba team Dimapur den January 26 nü final asayatsü.

January 22 nü Group-B nung mezüngbuba asaya Peren aser Wokha na anepdang 7:30 akok nungi tenzüka asayatsü aser tanabuba asaya Zunheboto o Mon na 11:45 ako nungi tenzüka asayatsü.

Open Tennis Cricket Tournament (T-20) ayonger

Dimapur, Aenjeti/January 20

(TYO): Mezüngbuba Champions Trophy Open Tennis Cricket Tournament (T-20) asayamung February 6 nü nungi Local Ground Chumukedima Town nung asayatsü.

Iba asayamung ya Nagamese Baptist Fellowship Sports Ministry Chumukedima Village-i ayongzüka lir aser "Pursue oneness" omen nung ajemdaker asayatsü.

Asayamung akoker nem senpet sen 50,000 aser tanabuba jenjang nung takok angur nem sen 25,000 agütsütsü. Iba dak alia sen 10,000 alang jurila senpet balala

agütsütsü.

Asayamung nung shilem agitsü atema form tem G Sports Chumukedima, Kiran Sports Dimapur aser Mercy Photoshop, Near Blackberry Showroom Kohima nung angutsü. Asayamung nung züngoksemtü atema sen 4000 agitsü aser form benoktsü atema tatemangbuba anogoji January 31, 2021 nü asütsü. Osang tejangja agitsü atema item number; 8132896500 mesera 7085836354 nung tongteprateptsü atema Organising Committee convener Jonathan-i sangdong ka ajanga metetdaksüogo.

Kiren Rijiju-i kho-kho coaching camp tenzüksü

Aenjeti/January 20, 2021

(Agencies): Sports Minister Kiren Rijiju-i Mongolbarnü kho-kho national coaching camp tenzüksüogo. Iba camp nung scientific evaluation programme ka ajanga asayar tajungtibatem shimtsü.

Kho-Kho Federation of India (KKFI) aser Ultimate Kho-Kho (UKK)-i, "Rise in Sports Excellence" ta nüngja agütsür High Performance Assessment and Scientific Analysis and Evaluation Programme ka tenzüko, koba linük nung mezüngbuba asütsü, ta sangdong ka ajanga metetdaksü.

"Ni sports science ya tarutsü atema tongtibang ta amanga aruogo. India ya saisapong nung powerhouse ka kümdaktsütsü atema asaya ajak renloka aotsü nüngdaker aser talisa Kho Kho amala sobaliba asaya renloktsü nüngdaker," ta Rijiju-i ashi.

"Federation aser Ultimate Kho Kho-i mapang tatsüka tsünga sentong tajung ka yangluogo koba tenüngsang agütsütsü tetemsü. India nung saisapongtem corporate temi nungita yaritsü nüngdaker," ta pai shisem.

Anogo 30 tashi camp akaba mapang tetsür 18 densema linük ajunga nungi asayar 138 Manav Rachna Sports Science Centre, Faridabad aser SGT University, Gurugram nung mongintemi asadangtsü.

Sports physiotherapy, rehabilitation, injury management, biomechanics, biokinetics, sports performance analysis, nutritional guidance aser posture corrections amala nung tengutetbatem aser parameters tem benoka inyaktü.

"Iba camp ya asayartem lenla aika nung terenlok atema Sports Science aser Technology tsütsü alizüng ka asütsü. Onok nükjidongji alima nung asayar tajungtiba kümdaktsütsü atema asayartem aika anitetsü asoshi lir, shirnok tarutsü nung asaya balala atema renema litetsü," ta KKFI tor Sudhanshu Mittal-i ashi.

Indian Olympic Association Secretary General Rajeev Mehta, Olympic medallists Abhinav Bindra aser Sushil Kumar, India pacer Mohammed Shami aser taoba India cricketer Suresh Raina nungera iba sentong nung dena liasü.

Toyota Thailand Open nungi Praneeth tuguogo

Anejeti/January 20, 2021

(Agenceies): COVID-19 tashidak potetba sülen India nunger asayar B Sai Praneeth tang asayaa aliba Toyota Thailand Open Super 1000 nungi tugutsüsa kümogo. Pa ya Tokyo Olympics nung India tenüng nungi asayatsü imlartem rongnung ka lir.

Taoba mapang world number one asayar Kidambi Srikanth, shiba Praneeth den takdang ka nung külemi anenzüka liasü, paa Badminton World Federation (BWF) inyakyim dak ajemdaker asayamung nungi tugutsüsa kümogo.

"India nunger asayar Sai Praneeth B dak COVID-19 tashidak potetba Badminton World Federation (BWF)-i jangjashitsür aser pa TOYOTA Thailand Open nungi tuguogo," ta BWF-i Mongolbar aonung metetdaksü.

"Hombarnü PCR test agiba sülen asayar dak tashidak keta aliba potetogo.

"Asayar temang maneni tendanga anepalutsü atema mozükidangi anirogo aser anogo 10 bosa mozükidang amungtsüsa akümtsü.

BWF-i ashiba agi, Praneeth aser teammate Kidambi Srikanth na hotel nung külemi senzüa liasü anungji paa asayamung nungi tuguatoksüsa kümogo.

Srikanth-i Mongolbarnü Thailand nunger asayar Sitthikom Thammasin 21-11 21-11 agi kokogo. Pa taoba hopta asayamung nung tanabuba round masaya tsünga yiruba ajanga tuguatoksütsüsa aküm. "BWF inyakyim dak ajemdaker TOYOTA Thailand Open nungi Kidambi tuguogo aser pa quarantine nung lir," ta BWF-i ashi.

"Ajisüaka Kidambi dak Hombarnü tashidak tendanga mapang Kidambi dak tashidak mepotet aser pa Thailand-i aruba sülen khien danga tashidak poteta mali.

Hombarnü PCR test asüba sülen India nunger asayar ka dak danga tashidak mepotet aser parnok ajak asayamung nung shilem agitsü atema temelaba agütsü.

Ajisüaka Thai health authorities, Badminton Association of Thailand (BAT) aser BWF-i, India team senzusenpong nung

tenokdangba agütsüogo, koba February 1 nü tashi benoktsü.

Taoba hopta Saina Nehwal aser HS Prannoy na dak COVID-19 tashidak keta lir ta potetsü saka mapang tatsüka lir tashidak keta mali ta jangjatsüba sülen Yonex Thailand Open nung shilem agitsü atema temelaba agüja liasü.

2021 IPL atema CSK-i Suresh Raina anisem

Aenjeti/January 20, 2021

(Agencies): 2021 Indian Premier League (IPL) atema Chennai Super Kings (CSK)-i Suresh Raina aniokogo. Club ketdangsürtemi Raina club nung aniokba jangjatsüogo aser pa MS Dhoni kübok asayatsü.

"Auh onoki Raina anisemtsü aser Dhoni captain asütsü. Harbhajan Singh dak alia onoki asayar karbo yokatoksü akok," ta CSK ketdangsür kati Indian Express dang ashi.

Taoba küm United Arab Emirates (UAE) nung IPL asayamung metenzük tsünga Raina-i CSK bubble toktsür oadok. Pai club toktsür aoba yimya ajanga club inyakyim nung timtem adok, ajisüaka CSK tekolakba N Srinivasan-i pa nem maongka agütsütsü atema telemtetba agiogo.

"Suresh Raina ya asayar tajung ka lir aser pai CSK atema tajung aika inyakogo. Onoki pa kanga akhümtsübur. Pai ajangtetbatem ajak atema onoki pa kanga akhümtsübur. CSK pa tsütsü teti adentsü," ta Srinivasan-i taoba küm ashi.

Arishi küm 34 tain Raina ya CSK nung batsmen tem takok tajungtiba anguba asayar lir aser pai asayar 164 nung run 4,527 yanglua lir. Pa international cricket asaya nungi anenogo, saka pa kanga tongtibang asayar ka ta züngshir. Raina medeni CSK pur taoba asayamung nung Playoffs

atema qualify masü aser parnok jenjang tenetbuba nung tembang.

Kasa mapang nung asayar tejen Harbhajan Singh-i CSK toktsüogo. "@ChennaiIPL den contract tembangogo.. Iba team nungi asayaba ya ni asoshi tajangshiba tajung ka liasü. Iba team nung jangradema asayaogo aser medemera tajung aika yimtetogo, koba ni tarutsü nunga menungraa bilemtetsü. Küm ana jangradema asayaba atema @ChennaiIPL, management, staff aser fan tem dang kanga pelar," ta pai tanü tweet asü.

BILEMDANGANG

"Temulung süa linera nükmerem yimya tokjang."